

四庫全書

史部

欽定四庫全書

史部
通志卷十八

詳校官侍讀臣陳萬青

編修臣裴謙履勘

覆校官助教臣金學詩

校對官典簿臣劉光第

謄錄舉人臣蔣傳馨

欽定四庫全書

通志卷十八

宋 右 廸 功 郎 鄭 樵 漁 仲 撰

隋紀第十八

文帝 煬帝 恭帝

高祖文皇帝姓楊氏諱堅小名那羅延本弘農華陰人
漢太尉震之十四世孫也震八世孫燕北平太守鉉鉉
子元壽魏初為武川鎮司馬因家于神武樹頽焉元壽

生太原太守惠嘏惠嘏生平原太守烈烈生寧遠將軍
禎禎生皇考忠初禎屬魏末喪亂避地中山結義徒以
討鮮于修禮遂死之周保定中皇考著勲追贈柱國大
將軍少保興城郡公皇考美須髯身長七尺八寸狀貌
瓌偉武藝絕倫識量深重有將帥之畧年十八客游泰
山會梁兵陷郡國沒江南及北海王元顥入洛乃與俱
歸顥敗爾朱度律召為帳下統軍後從獨孤信屢有軍
功又與信從魏孝武西遷東魏荊州刺史辛纂據穰城

皇考從信討之與都督康洛兒元長生乘城而入彎弓
大呼斬纂以徇城中懾服居半歲以東魏之逼與信俱
歸周文帝召居帳下嘗從周文狩於龍門皇考獨當一
猛虎左挾其腰右拔其舌周文壯之北臺謂猛虎為拵
于因以字之從禽竇泰破沙苑陣封襄武縣公河橋之
役皇考與壯士五人力戰守橋敵人不敵進又與李遠
破黑水稽胡并與怡峯解玉壁圍以功歷雲洛二州刺
史芒山之戰先登陷陣除大都督及侯景度江梁氏喪

敗周文將經畧乃授皇考都督荊州等十五州諸軍事
鎮穰城梁雍州刺史岳陽王蕭詧雖曰稱藩而尚懷貳
心皇考自樊城觀兵漢濱易旗遞進實二千騎登樓
望之以為三萬懼而服焉又攻梁隨郡剋之獲其守桓
和所過城戍望風請服進圍安陸梁司州刺史柳仲禮
恐安陸不守馳歸赴援諸將恐仲禮至則安陸難下請
急攻之皇考曰仲禮已在近路吾以奇兵襲之一舉必
剋則安陸不攻自拔諸城可傳檄而定於是選騎二千

銜枚夜進遇仲禮於滹頭禽之悉俘其衆安陸竟陵並
降梁元帝大懼送子方略為質并送載書請魏以石城
為限梁以安陸為界皇考乃旋師進爵陳留郡公位大
將軍十七年梁元帝逼其兄邵陵王綸綸送質於齊欲
來寇梁元帝密報周文遣皇考討之禽綸數其罪殺之
初皇考禽柳仲禮遇之甚厚仲禮至京反譖皇考言在
軍大取金寶周文以皇考功重不問然皇考悔不殺仲
禮故至此殺綸皇考間歲再舉盡定漢東地甚得新附

心魏恭帝賜姓普六茹氏行同州事及于謹伐江陵皇
考為前軍屯江津遏其走路梁人束刃於象鼻以戰皇
考射之二象反走江陵平周文立蕭譽為梁主令皇考
鎮穰城周孝閔踐阼入為小宗伯及司馬消難請降皇
考與柱國達奚武援之入齊境五百里前後遣三使報
消難皆不反命及去北豫州三十里武疑有變欲還皇
考曰有進死無退生獨以千騎夜趣城下候門開而入
乃馳遣召武時齊鎮城伏敬遠勒甲士三千據東陴舉

烽嚴警武憚之不欲保城乃多取財寶以消難先歸皇
考以三千騎殿到洛南皆解鞍而卧齊衆來追至於洛
北皇考謂將士曰但飽食今在死城賊必不敢度水食
畢齊兵陽若度水皇考馳將擊之齊兵不敢逼遂徐引
而還武歎曰達奚武自言是天下健兒今日服矣進位
柱國大將軍武成元年進封隋國公邑萬戶別食竟陵
縣一千戶收其租賦保定二年為大司空時朝議與突
厥伐齊公卿以齊兵彊國富斛律明月不易可當兵非

十萬衆不可皇考獨曰萬騎足矣明月豎子亦何能為
三年乃以皇考為元帥大將軍楊纂李穆王傑爾朱敏
及開府元壽田弘慕容近等皆隸焉又令達奚武帥步
騎三萬自南道進期會晉陽皇考乃留敏據什賁游兵
河上皇考出武川過故宅祭先人饗將士席卷二十餘
城齊人守陁嶺之隘皇考縱奇兵大破之留楊纂屯靈
邱為後拒突厥木杆可汗控地頭可汗步離可汗等以
十萬騎來會四年正月朔攻晉陽時大雪風寒齊人乃

悉其精銳鼓譟而出突厥引上西山不肯戰衆失色皇
考乃率七百人步戰死者十四五以武後期乃班師齊
人亦不敢逼突厥乃縱兵大掠自晉陽至平城七百餘
里人畜無遺周武帝拜皇考為太傅晉公護以其不附
已以為涇州總管是歲大軍又東伐晉公護出洛陽令
皇考出沃野以應接突厥時軍糧少諸將憂之皇考曰
當權以濟事耳乃招誘稽胡首領咸令在坐使王傑盛
軍容鳴鼓而出皇考陽怪問之傑曰大冢宰已至洛陽

天子聞銀夏間胡擾動故使傑就攻除之又令突厥使
者馳告曰可汗更入并留兵馬十萬在長城下故令問
公若有稽胡不服欲來共破之坐者皆懼皇考慰喻遣
之於是歸命饋輸填積屬晉公護先退皇考亦罷兵而
還鎮又以政績稱詔賜錢三千萬布五百疋穀二千斛
以疾還京周武帝及晉公護屢臨視焉薨贈太保都督
同朔等十二州軍事同州刺史本官如故諡曰桓公開
皇元年追尊為武元皇帝廟號太祖帝武元皇帝之長

子也皇妣曰呂氏以周大統七年六月癸丑夜生帝於馮翊波若寺有紫氣充庭時有尼來自河東謂皇妣曰此兒所從來甚異不可於俗間處之乃將帝舍於別館躬自撫養皇妣抱帝忽見頭上出角徧體起鱗墜帝于地尼自外見曰已驚我兒致令晚得天下帝龍額額上有五柱入頂目光外射有文在手曰王字長上短下沈深嚴重初入大學雖至親昵不敢狎也年十四京兆尹薛善辟為功曹十五以皇考勲授散騎常侍車騎大將

軍儀同三司封成紀縣公十六遷驃騎大將軍加開府
周文帝見而歎曰此兒風骨非世間人明帝即位授右
小宗伯進封大興郡公明帝常遣善相者來和視帝和
詭對曰不過柱國既而私謂帝曰公當為天下君必大
誅殺而後定周武帝即位遷小宗伯出為隨州刺史進
位大將軍後徵還遇皇妣寢疾三年晝夜不離左右以
純孝稱宇文護執政尤忌帝屢將害焉賴大將軍侯伏
侯壽等救護以免後襲爵隋國公周武既為皇太子聘

帝長女為妃益加禮重齊王憲言於周武曰普六茹堅
相貌非常臣每見之不覺自失恐非人下請早除之周
武曰此止可為將耳內史王軌驟諫曰皇太子非社稷
主普六茹堅有反相周武不悅曰必有天命將若之何
帝甚懼深自晦匿後從周武平齊進柱國又與齊王憲
破齊任城王湝於冀州除定州總管先是州城門久閉
不行齊人自文宣時或請開之文宣不許曰當有聖人
啓之及帝至而開之莫不驚異遷亳州總管周宣帝即

位以后父徵拜上柱國大司馬

大象元年遷大後丞右司武俄轉大前疑周宣帝每巡幸恒委以居守時宣帝為刑經聖制其法深刻帝以法令滋章非興化之道切諫不納帝位望益隆宣帝頗以為忌時宣帝有四幸姬並為皇后爭寵相毀宣帝每謂后曰必族滅爾家因召帝命左右曰若色動即殺之帝容色自若遂免

二年五月以帝為揚州總管將發暴足疾而止乙未宣

帝不怠時靜帝幼冲前內史上大夫鄭譯御正大夫劉昉以帝皇后之父衆望所集遂矯詔引帝入侍疾因受遺輔政都督內外諸軍事帝恐周武諸王在藩生變稱趙王招將嫁女於突厥為詞以徵之己酉宣帝崩庚戌靜帝詔帝假黃鉞左大丞相百官總已而聽焉以正陽宮為丞相府以鄭譯為長史劉昉為司馬具置寮佐周宣時刑政峻酷者悉更以寬大之制天下歸心矣六月趙王招陳王純越王達代王盛滕王道並至長安相州

總管尉遲迴自以宿將至是不能平遂舉兵趙魏之士響應旬日間衆至十餘萬宇文弔以榮州石碇以建州席毗以沛郡毗弟義羅以兗州皆應迴遣子質於陳以求援帝命上柱國鄖公韋孝寬討之雍州牧畢王賢及趙陳等五王謀作亂帝執賢斬之而掩趙王等罪因詔五王劔履上殿入朝不趨以安之時五王陰謀滋甚帝以酒肴造趙王觀其指趙王伏甲於卧内帝賴元弔以免於是誅趙越二王八月庚午韋孝寬破尉遲迴斬之

傳首闕下餘黨悉平初迴之亂鄖州總管司馬消難據
州應迴淮南州縣多從之襄州總管王誼討之消難奔
陳荆郢羣蠻乘釁而起命亳州總管賀若誼討平之先
是上柱國王謙為益州總管亦擁衆巴蜀以匡復為辭
帝以東夏山南為事未遑致討謙遂出劔口陷始州至
是乃命上柱國梁睿討平之傳首闕下隳劔閣之險以
絕姦亂之萌焉九月壬子周帝進帝大丞相十月周帝
詔追贈皇曾祖烈為柱國太保都督徐究等十州諸軍

事徐州刺史隋國公諡曰康皇祖禎為柱國太傅都督
陝蒲等十三州諸軍事同州刺史隋國公諡曰獻皇考
忠為上柱國太師大冢宰都督冀定等十三州諸軍事
雍州牧壬戌誅陳王純周帝進帝大冢宰五府總於天
官十一月辛未誅代王達滕王逌十二月甲子周帝授
帝相國總百揆去都督內外諸軍事大冢宰之號進爵
為王以隋州之崇業鄖州之安陸城陽溫州之宜人應
州之平靖上明順州之淮南士州之永川昌州之廣昌

安昌申州之義陽淮安息州之新蔡建安豫州之汝南
臨潁廣寧初安蔡州之蔡陽郢州之漢東二十郡為隋
國劔履上殿入朝不趨贊拜不名備九錫之禮加璽綬
遠游冠相國印綠綬綬位在諸侯王上隋國置丞相以
下一依舊式帝再讓乃授王爵十郡而已周帝詔進皇
祖皇考爵並為王夫人為王妃

大定元年二月壬子下令曰以前賜姓皆復其舊甲寅
帝受九錫之禮丙辰周帝又詔帝冕十有二旒建天子

旌旗出警入蹕乘金根車駕六馬備五時副車置旄頭雲罕樂舞八佾設鐘簋宮縣王妃為王后世子為太子前後三讓乃受俄而下詔依唐虞漢魏故事帝三讓不許乃遣太傅上柱國杞國公椿奉冊大宗伯大將軍金城公趙襲奉皇帝璽綬于隋宮百官勸進帝乃受焉

開皇元年春二月甲子自相府常服入宮備禮即皇帝位於臨光殿設壇於南郊遣兼太傅上柱國鄧公竇熾柴燎告天是日告廟大赦改元京師慶雲見改周官依

漢魏之舊制以柱國司馬高頻為尚書左僕射兼納言
相國司錄虞慶則為內史監兼吏部尚書相國內郎李
德林為內史令上開府韋世康為禮部尚書上開府元
暉為都官尚書開府戶部尚書元巖為兵部尚書上儀
同司宗長孫毗為工部尚書上儀同司會楊尚希為度
支尚書雍州牧楊惠為左衛大將軍乙丑追尊皇考為
武元皇帝廟號太祖皇妣呂氏為元明皇后改周氏左
社右廟制為右社左廟遣八使巡省風俗丙寅修廟社

立王后獨孤氏為皇后王太子勇為皇太子丁卯以大將軍趙斐為尚書右僕射以上開府伊婁彥恭為右武侯大將軍己巳以五千戶封周帝介國公為隋室賓旌旗車服禮樂一如其舊上書不為表答表不稱詔周氏諸王盡降為公辛未以皇弟同安郡公爽為雍州牧乙亥封皇弟邵國公慧為滕王同安公爽為衛王皇子鴈門公廣為晉王俊為秦王秀為越王諒為漢王并州總管李穆為太師上柱國竇熾為太傅幽州總管于翼為

太尉觀國公田仁恭為太子太師武德郡公柳敏為太子太保丁丑以晉王廣為并州總管封陳留郡公智積為蔡王興城郡公靜為道王戊寅改東京府為尚書省發官牛五千頭分賜貧人三月宣仁門槐樹連理衆枝內附壬午白狼國獻方物丁亥詔犬馬器翫口味不得獻上戊子弛山澤禁己丑移盤屋連理樹植于宮庭戊戌以太子少保蘇威兼納言吏部尚書庚子詔前代品爵悉依舊定丁未梁蕭巖歸使其太宰蕭巖來賀夏四月

辛巳大赦戊戌太常散樂並免為編戶禁雜樂百戲辛
丑陳人來聘于周至而上巳受禪致之介國是月發稽
胡修築長城二旬而罷五月戊午封邦國公楊雄為廣
平王永康郡公楊弘為河間王辛未介公薨上舉哀於
朝堂諡曰周靜帝六月癸未詔以初受命赤雀降祥推
五德相生為火色其郊及社廟衣服冕之儀而朝會之
服旗幟犧牲盡尚赤戎服尚黃秋七月乙卯上始服黃
百寮畢賀八月壬午廢東京官甲午遣樂安公元諧擊

吐谷渾於青海破而降之九月戊申遣使振給戰亡者
家庚午陳將周羅暉攻陷胡墅蕭摩訶寇江北辛未以
越王秀為益州總管改封蜀王壬申以薛公長孫覽宋
安公元景山並為行軍元帥伐陳仍令尚書左僕射高
頴節度諸軍是月行五銖錢冬十月乙酉百濟王扶餘
昌遣使來賀授昌上開府儀同三司帶方郡公戊子行
新律壬辰行幸岐州十一月乙卯以永富郡公竇榮定
為右武侯大將軍遣兼散騎侍郎鄭撫使於陳己巳有

流星聲如墮墻光照于地十二月甲申以禮部尚書韋世康為吏部尚書庚子至自岐州壬寅高麗王高陽遣使朝貢授陽大將軍遼東郡公太子太保柳敏卒是歲靺鞨突厥阿波可汗沙鉢略可汗並遣使朝貢

二年春正月庚申陳宣帝殂辛酉置河北道行臺尚書省於并州以晉王廣為尚書令置河南道行臺尚書省於洛州以秦王俊為尚書令置西南道行臺尚書省於益州以蜀王秀為尚書令戊辰陳人遣使請和求歸胡

墅甲戌詔舉賢良二月己丑詔以陳有喪命高頴等班
師庚寅加晉王廣左武衛大將軍秦王俊右武衛大將
軍庚子京師雨土三月初命入宮殿門通籍戊申開渠
引杜陽水於三時原四月丁丑以寧州刺史竇榮定為
左武侯大將軍韓僧壽破突厥於雞頭山上柱國李充
破突厥於河北山五月戊申以上開府長孫平為度支
尚書己酉上以旱親省囚徒其日大雨己未高寶寧寇
平州突厥入長城庚申以豫州刺史皇甫績為都官尚

書甲子改傳國璽曰受命璽丁卯制民年六十以上免課六月壬午以大府卿蘇孝慈為兵部尚書甲申使使弔陳乙酉上柱國李充破突厥于馬邑丙申詔遷都龍首山命左僕射高顙將作大匠劉龍鉅鹿郡公賀婁子幹太府少卿高龍義等創造新都秋七月癸巳詔新置都處墳墓令悉遷葬設祭仍給人功無主者命官為殯葬甲午行新令冬十月以撤毀故徙居東宮給内外宮人祿癸酉皇太子勇屯兵咸陽以備胡虜庚寅上疾愈

享百寮於觀德殿賜錢帛皆任自取盡力以出辛卯以營新都副監賀婁子幹為工部尚書十一月丙午初命為方陣戰法及制軍營圖樣下諸軍府以擬征突厥十二月辛未上講武于後園甲戌上柱國竇毅卒丙子名新都曰大興城乙酉遣彭城公虞慶則屯弘化以備胡突厥寇周槃行軍總管達奚長儒為虜所敗丙戌賜國子生經明者束帛丁亥親錄囚徒是歲高麗百濟並遣使朝貢

三年春正月庚子將遷新都大赦禁大刀長稍始令人以二十一成丁歲役功不過二十日不役者收庸廢遠近酒坊罷鹽井禁二月己巳朔日有蝕之癸酉陳人來聘突厥犯邊癸未以左武衛大將軍李禮成為右武衛大將軍三月丁未上柱國鮮虞縣公謝慶恩卒丙辰以雨故常服入新都京師承明里醴泉出丁巳詔購遺書於天下癸亥城榆關夏四月己巳衛王爽大破突厥於白道山停築原陽雲內紫河等鎮而還上柱國建平郡

公于義卒庚午吐谷渾寇臨洮洮州刺史皮子信死之
壬申以尚書右僕射趙貶兼內史令丁丑以滕王瓚為
雍州牧庚辰行軍總管陰壽大破高寶寧于黃龍甲申
以旱故上親祀雨師丙戌詔天下勸學行禮己丑陳郢
州城主張子譏遣使請降上以和好不納辛卯遣兼散
騎常侍薛舒聘於陳癸巳上親雩五月癸卯太尉任城
公于翼薨行軍總管李晃破突厥於摩那渡口乙巳梁
太子蕭琮來賀遷都辛酉親祀方澤壬戌行軍元帥竇

榮定破突厥及吐谷渾於涼州赦黃龍死罪以下六月
庚午封衛王爽子集為遂安郡王戊寅突厥遣使求和
庚辰行軍總管梁遠破吐谷渾於爾汗山斬其名王秋
七月壬戌詔往者山東河表經此妖亂孤城遠守多不
自全濟陰太守杜猷身陷賊徒命懸逆手郡省事范臺
玟傾產營護免其戮辱眷言誠節實有可嘉宜超爵賞
用明沮勸臺玟可大都督假湘州刺史丁卯日有蝕之
八月壬午遣尚書右僕射高潁出寧州道吏部尚書虞

慶則出原州道並為行軍元帥以擊胡戊子親祀太社
九月壬子幸城東觀穀稼癸丑大赦冬十月甲戌廢河
南道行臺省十一月發使巡省風俗庚辰陳人來聘陳
主知帝貌異世人使副使袁彥圖像而去甲午罷天下
諸郡十二月乙卯遣兼散騎常侍唐令則使於陳戊午
以刑部尚書蘇威為戶部尚書是歲高麗突厥靺鞨並
遣使朝貢

四年春正月甲子朔日有蝕之祀太廟辛未祀南郊壬

申梁主蕭歸來朝甲戌大射於北苑十日而罷壬午齊
州水辛卯渝州獲獸似麋一角同蹄壬辰班新歷二月
乙巳上餞梁主于霸上庚戌行幸隴州突厥可汗阿史
那玷厥率其屬來降夏四月己亥敕總管刺史父母及
子年十五以上不得將之官庚子以吏部尚書虞慶則
為尚書右僕射瀛州刺史楊尚希為兵部尚書毛州刺
史劉仁恩為刑部尚書五月癸酉契丹主莫賀弗遣使
請降拜大將軍六月庚子降囚徒壬子開通濟渠自渭

達河以通運漕甲寅制官人非戰功不授上柱國以下
戎官以雍同華岐宜五州旱命無出今年租調戊午秦
王俊來朝秋七月丙寅陳人來聘八月甲午遣十使巡
省天下戊戌衛王爽來朝壬寅上柱國太傅鄧公竇熾
薨乙卯陳將夏侯苗請降上以通和不納九月己巳上
親錄囚徒庚午契丹內附甲戌以關中饑行幸洛陽冬
十一月壬戌遣兼散騎常侍薛道衡使於陳甲戌改周
十二月為臘蜡是歲靺鞨及女國並遣使朝貢

五年春正月戊辰詔行新禮壬申詔罷江陵總管其後
梁主請依舊許之三月戊午以尚書左僕射高頌為左
領軍大將軍以上柱國宇文忻為右領軍大將軍夏四
月甲午契丹遣使朝貢壬寅上柱國王誼謀反誅乙卯
詔徵山東大儒馬榮伯等戊申車駕至自洛陽五月甲
申初置義倉梁主蕭歸殂遣上大將軍元契使于突厥
阿波可汗秋七月庚申陳人來聘壬午突厥沙鉢略可
汗上表稱臣八月甲辰河南諸州水遣戶部尚書蘇威

振給之戊申有流星數百四散而下九月乙丑改鮑陂
曰杜陂霸水曰滋水丙子遣兼散騎常侍李若使於陳
冬十一月丁卯晉王廣來朝十二月丁未降囚徒

六年春正月甲子党項羌內附庚子班歷於突厥壬申
使戶部尚書蘇威巡省山東二月乙酉山南荆浙七州
水遣前工部尚書長孫毗振恤之丙戌制刺史上佐每
歲暮更入朝上考課丁亥發丁男十一萬修築長城二
旬而罷庚子大赦三月己未洛陽男子高德上書請帝

為太上皇傳位皇太子帝曰朕承天命撫育蒼生日肝
孜孜猶恐不逮豈學近代帝王事不師古傳位於子自
求逸樂哉癸亥突厥沙鉢略可汗遣使朝貢夏四月己
亥陳人來聘秋七月辛亥河南諸州水乙丑京師雨毛
如馬駿尾長者二尺餘短者有六七寸八月辛卯關內
七州旱蠲其賦稅遣散騎常侍裴世豪使于陳戊申上
柱國太師申公李穆薨閏月丁卯皇太子鎮洛陽辛未
晉王廣秦王俊並來朝丙子上柱國郕公梁士彥上柱

國祀公宇文忻柱國舒公劉昉謀反伏誅上柱國許公宇文善有罪除名九月辛巳帝素服御射殿詔百寮射賜梁士彥三家資物丙戌上柱國宋安公元景山卒辛丑詔振恤大象以來死事之家冬十月己酉以河北道行臺尚書令并州總管晉王廣為雍州牧餘官如故以兵部尚書楊尚希為禮部尚書癸丑置山南道行臺尚書省於襄州以秦王俊為尚書令

七年春正月癸巳祀太廟乙未制諸州歲貢三人二月

丁巳祀朝日於東郊己巳陳人來聘壬申幸醴泉宮是月發丁男十萬修築長城二旬而罷夏四月庚戌於揚州開山陽瀆以通運漕突厥沙鉢略可汗卒癸亥頒青龍符於東方總管刺史西方以白虎南方以朱雀北方以元武甲戌遣兼散騎常侍楊周使于陳以戶部尚書蘇威為吏部尚書五月乙亥朔日有蝕之己卯隕石於武安滏陽間十餘里秋七月己丑衛王爽薨八月庚申梁王蕭琛來朝九月乙酉梁安平王蕭巖掠於其國以

奔陳辛卯廢梁國曲赦江陵以梁王蕭琛為柱國封莒國公冬十月庚申行幸同州以先帝所居故曲赦囚徒癸亥幸蒲州丙寅宴父老上極歡曰此間人物衣服鮮麗容止閑雅良由仕宦之鄉陶染成俗也十一月甲午幸馮翊祠故社父老對詔失旨上大怒免其縣官而去戊戌車駕至自馮翊

八年春正月乙亥陳人來聘二月辛酉陳人寇陝州三月辛未上柱國隴西公李詢卒甲戌遣兼散騎常侍程

尚賢使于陳戊寅詔大舉伐陳秋八月丁未河北諸州
飢遣吏部尚書蘇威振恤之九月癸巳嘉州言龍見冬
十月己未置淮南行臺省於壽春以晉王廣為尚書令
辛酉陳人來聘拘留不遣甲子有星孛于牽牛享太廟
授律令晉王廣秦王俊清河公楊素並為行軍元帥以
伐陳於是晉王出六合秦王出襄陽清河公楊素出信
州荊州刺史劉仁恩出江陵宜陽公王世積出蘄春新
義公韓擒虎出廬江襄邑公賀若弼出吳州洛藪公燕

榮出東海合總管九十兵五十一萬八千皆受晉王節
度東接滄海西拒巴蜀旌旃舟楫橫亘數千里仍曲赦
陳國十一月丁卯車駕餞師詔購陳叔寶位上柱國萬
戶公乙亥行幸定城陳師誓衆丙子幸河東十二月車
駕至自河東

九年春正月癸酉以尚書左僕射虞慶則為右衛大將
軍丙子賀若弼敗陳師於蔣山獲其將蕭摩訶韓擒虎
進師入建鄴獲陳主叔寶陳國平得州四十郡一百縣

四百戶五十萬口二百萬癸巳遣使持節巡撫之二月
乙未廢淮南尚書省丙申制五百家為鄉正一人百家
為里長一人夏四月己亥幸驪山親勞旋師乙巳三軍
凱入獻俘於太廟以晉王廣為太尉庚戌帝御廣陽門
宴將士頒賜各有差辛亥大赦以陳都官尚書孔範散
騎常侍王瑳王儀御史中丞沈觀等邪佞於其主以致
亡滅皆投之邊裔陳人普給復十年軍人畢世免徭役
擢陳之文武衆才而用之官奴數千可歸者歸之其餘

盡以分賜將士及王公貴臣其資物皆於五梁賜王公
以下大射毀所得秦漢三大鐘越二大鼓又設亡陳女
樂謂公卿等曰此聲似啼朕聞之甚不喜故與公等一
聽亡國之音俱為永鑒焉辛酉以吏部侍郎宇文弼為
刑部尚書宗正卿楊昇為工部尚書壬戌詔曰今率土
大同含生遂性兵可立威不可不戢刑可助化不可專
行禁衛九重之餘鎮守四方之外戎旅軍器皆宜停罷
武力之子俱可學文民間甲仗悉皆除毀閏月丁丑頒

木魚符於總管刺史雌一雄一己卯以吏部尚書蘇威
為尚書右僕射六月乙丑以荊州總管楊素為納言丁
卯以吏部侍郎盧愷為禮部尚書時羣臣咸請封禪詔
不許曰豈可命一將軍除一小國以薄德而封名山用
虛言而干上帝耶八月壬戌以廣平王雄為司空冬十
一月壬辰定州刺史豆盧通等上表請封禪上不許庚
子以右衛軍大將軍虞慶則為右武侯大將軍右領軍
將軍李安為右領軍大將軍甲寅降囚徒十二月甲子

詔太常卿牛弘通直散騎常侍許善心祕書丞姚察通直郎虞世基等議定樂

十年春正月乙未以皇孫昭為河南王楷為華陽王二月庚申幸并州夏五月乙未詔以魏末喪亂兵士軍人權置坊府居處無定自今軍人可悉屬州縣墾田籍帳一同編戶軍府統領宜依舊式罷山東河南及北方緣邊之地新置軍府六月辛酉制人年五十免役折庸秋七月癸卯以納言楊素為內史令庚戌上親錄囚徒辛

亥高麗遼東郡公高陽卒八月壬申遣柱國韋洸上開
府王景並持節巡撫嶺南百越皆服九月丁酉至自并
州冬十月甲子頒木魚符於京官五品以上十一月辛
卯幸國學頒賜各有差辛丑祀南郊是月婺州人汪文
進會稽人高智慧蘇州人沈元愴皆舉兵反自稱天子
樂安蔡道人饒州吳代華永嘉沈孝徹泉州王國慶餘
杭楊寶英交趾李春等皆自稱大都督詔內史令楊素
討平之是歲吐谷渾契丹並遣使來朝貢

十一年春正月丁酉以平陳所得古器多為妖變悉命
毀之丙午皇太子妃元氏薨上舉哀於東宮文思殿二
月戊午以大將軍蘇孝慈為工部尚書丙子以臨潁令
劉曠政績尤異擢為莒州刺史辛巳晦日有蝕之夏五
月乙巳以右衛將軍元旻為左衛大將軍秋八月壬申
滕王瓚薨乙亥上柱國沛國公鄭譯卒是歲高麗誅靺
並遣使朝貢突厥獻七寶盤

十二年春正月己巳以蜀王秀為內史令兼右領軍大

將軍以漢王諒為雍州牧右衛大將軍秋七月乙巳尚書右僕射邳公蘇威禮部尚書容城侯盧愷並坐事除名壬申晦日有蝕之八月甲戌制天下死罪諸州不得便決皆令大理覆之癸巳制宿衛者不得輒離所守丁酉上柱國楚公豆盧勣卒戊戌上親錄囚徒冬十月丁丑以遂安王集為衛王壬午祀太廟至太祖神主前帝流涕嗚咽不自勝十一月辛亥祀南郊己未上柱國新義公韓擒虎卒甲子百寮大射於武德殿十二月乙酉

以內史令楊素為尚書右僕射是歲突厥吐谷渾靺鞨
並遣使朝貢

十三年春正月乙巳上柱國郇公韓建業卒壬子祀感
生帝己未以信州總管韋世康為吏部尚書壬戌行幸
岐州二月丙子詔營仁壽宮丁亥至自岐州己卯立皇
孫陳為豫章王戊子晉州刺史南陽郡公賈悉達隰州
總管撫寧郡公韓延等以賄伏誅己丑制坐事去官者
配防一年丁酉制私家不得隱藏緯侯圖讖夏五月癸

亥詔禁人間撰集國史臧否人物秋七月戊辰晦日有
蝕之九月丙辰降囚徒庚申封邵公楊綸為滕王冬十
一月乙卯上柱國華陰公梁彥光卒是歲契丹雪室韋
靺鞨並遣使朝貢

十四年夏四月乙丑詔曰比命有司總令研究正樂雅
聲詳定已訖宜即施用見行者停人間音樂流僻日久
棄其舊體競造繁聲流宕不歸遂以成俗宜加禁約務
存其本五月辛酉京師地震關內諸州旱六月丁卯詔

省府州縣皆給廨田不得興生與人爭利秋七月乙未以邳公蘇威為納言八月辛未關中大旱人飢行幸洛陽并命百姓山東就食冬閏十月甲寅詔曰梁齊陳往皆創業一方綿歷年代既宗祀廢絕祭奠無主興言矜念良以愴然邕國公蕭琮及高仁英陳叔寶等宜令以時世修祭祀所須器物有司給之乙卯制外官九品以上父母及子年十五不得從之官十一月壬戌制州縣佐史三年一代不得重任癸未有星孛于角亢十二月

乙未東巡狩

十五年春正月壬戌車駕次齊州親問疾苦丙寅旅王符山庚午以歲旱祀太山以謝愆咎大赦二月丙辰禁私家畜兵器關中緣邊不在其例禁河以東無得乘馬丁巳上柱國蔣公梁睿卒三月乙未車駕至自東巡望祭五嶽海瀆丁亥幸仁壽宮夏四月己丑朔大赦甲辰以趙州刺史楊達為工部尚書五月丁亥制京官五品以上佩銅魚符六月戊子詔鑿砥柱庚寅相州刺史豆

盧通貢綾文布命焚之于朝堂辛丑詔名山未祀典者悉命祀之秋七月甲戌遣邳公蘇威巡省江南戊寅至自仁壽宮辛巳制九品以上官以理去官者並聽執笏冬十二月戊子敕盜邊糧一升以上皆斬籍沒其家己丑詔文武官以四考更代是歲吐谷渾林邑等國並遣使朝貢

十六年春二月丁亥封皇孫裕為平原王筠為安成王疑為安平王恪為襄城王該為高陽王韶為建安王暉

為潁川王夏六月甲午制工商不得進仕并州大蝗辛
丑詔九品以上妻五品以上妾夫亡不得改嫁秋八月
庚戌詔決死罪者三奏而後行刑冬十月己丑幸長春
宮十一月壬子至自長春宮

十七年春二月癸未太平公史萬歲伐西寧剋之庚寅
行幸仁壽宮庚子上柱國王世積討桂州賊李光仕平
之三月丙辰詔諸司屬官有犯聽於律令外斟酌決杖
辛酉上親錄囚徒癸亥上柱國彭城公劉昶以罪伏誅

庚午遣御史柳或皇甫誕巡省河南北夏四月戊寅頒
新歷五月庚申宴百寮於玉女泉班賜各有差己巳蜀
王秀來朝閏月己卯羣鹿入殿門馴擾侍衛之內秋七
月丁丑桂州人李世賢反遣右武侯大將軍虞慶則討
平之丁亥并州總管秦王俊坐事免以王就第九月甲
申車駕至自仁壽宮庚寅上謂侍臣曰廟庭設樂本以
迎神齋祭之日觸目多感當此之際何可為心在路奏
樂禮為未允公卿宜更詳之冬十月丁未頒銅虎符於

驃騎車騎府戊申道王靜薨庚午詔自今享廟日不須
備鼓吹殿庭勿設樂縣辛未京下大索十二月壬子上
柱國右武侯大將軍魯公虞慶則以罪伏誅是歲高麗
突厥並遣使朝貢

十八年春正月辛丑詔曰吳越之人徃承弊俗所在之
處私造大船因相聚結致有侵害江南諸州人間有船
長三丈以上悉括入官二月甲辰幸仁壽宮丁巳以漢
王諒為行軍元帥水陸三十萬伐高麗夏五月辛亥詔

畜猫鬼蠱毒厭魅野道之家投于四裔六月丙寅詔黜
高麗王高元官爵秋八月丙子詔京官五品以上總管
刺史舉志行修謹清平幹濟之士九月己丑漢王諒師
遇疾疫而旋死者十二三庚寅敕舍客無公驗者坐及
刺史縣令辛卯車駕至自仁壽宮冬十一月甲戌帝親
錄囚徒癸未祀南郊十二月庚子上柱國夏州總管東
萊公王景以罪伏誅是歲自京師至仁壽宮置行宮十
所祀宋陳亳曹戴潁等州水詔並免庸調

十九年春正月癸酉大赦戊寅大射于武德殿二月己亥晉王廣來朝甲寅幸仁壽宮夏四月丁酉突厥利可汗內附達頭可汗犯塞行軍總管史萬歲擊破之六月丁酉以豫章王暕為內史令秋八月癸卯上柱國尚書左僕射齊公高潁坐事免辛亥上柱國皖城公張威卒甲寅上柱國城陽公李徹卒九月乙丑以太常卿牛弘為吏部尚書冬十月甲午以突厥利可汗為啓民可汗築大利城處其部落十一月有司言元年已來日漸長

十二月乙未突厥都藍可汗為部下所殺國大亂星隕於勃海

二十年春正月辛酉朔突厥高麗契丹並遣使朝貢二月丁丑無雲而雷三月辛卯熙州人李英林反遣行軍總管張衡討之夏四月壬戌突厥犯塞以晉王廣為行軍元帥擊破之乙亥天有聲如寫水自南而北六月丁丑秦王俊薨秋九月丁未車駕至自仁壽宮冬十月乙丑廢皇太子勇及其諸子並為庶人殺柱國太平公史

萬歲已巳殺左衛大將軍五原公元昊十一月戊子以
晉王廣為皇太子天下地震京城大風雪十二月戊午
詔東宮官屬於皇太子不得稱臣辛巳詔毀壞偷盜佛
及天尊像獄鎮海瀆神形者以不道論沙門壞佛像道
士壞天尊像以惡逆論

仁壽元年春正月乙酉朔大赦改元以尚書右僕射楊
素為左僕射以納言蘇威為右僕射丁酉徙河南王昭
為晉王突厥寇恒安遣柱國韓洪擊之敗焉以晉王昭

為內史令辛丑詔曰投生殉節自古稱難殞身王事禮
加二等而世俗之徒不達大義致命戎旅不入兆域興
言念此每深愍歎且入廟祭祀並不廢闕何止墳塋獨
在其外自今戰亡之徒宜入墓域二月乙卯朔日有蝕
之夏五月巳丑突厥男女九萬餘口來降壬辰驟雨震
雷大風拔木宜君湫水移於始平六月乙卯遣十六使
巡省風俗乙丑廢太學及州縣學唯留國子一學取正
三品以上子七十二人充生員頒舍利於諸州秋七月

戊戌改國子為太學十一月己丑祀南郊十二月楊素擊突厥大破之

二年春三月己亥幸仁壽宮夏四月庚戌岐雍二州地震秋七月丙戌詔内外官各舉所知八月己巳皇后獨孤氏崩九月丙戌車駕至自仁壽宮壬辰河北諸州大水遣工部尚書楊達振恤之乙未上柱國襄州總管金水公周搖卒隴西地震冬十月壬子曲赦益州管内癸丑以工部尚書楊達為納言閏月甲申詔尚書左僕射

楊素與諸術者判定陰陽舛謬已丑詔左僕射越公楊素右僕射邵公蘇威吏部尚書竒章公牛弘內史侍郎薛道衡秘書丞許善心內史舍人虞世基著作郎王劭等修定五禮壬寅葬獻皇后於太陵十二月癸巳益州總管蜀王秀有罪廢為庶人交州人李佛子舉兵反遣行軍總管劉方討平之

三年春二月戊子以大將軍蔡陽郡公姚辯為左武侯大將軍夏五月癸卯詔曰六月十三日是朕生日其日

令海內為武元皇帝元明皇后斷屠六月甲午詔三年之喪依禮十二月而祥中月而禫用合聖人之意秋七月丁卯詔州縣搜揚賢哲皆取明知古今通識安危究政教之本達禮樂之原不限多少不得不舉徵召將送必須以禮八月壬申上柱國檢校幽州總管落藁公燕榮以罪伏誅九月壬戌置常平官甲子以營州總管韋冲為戶部尚書十二月癸酉河南諸州水遣納言楊達振恤之

四年春正月丙辰大赦甲子幸仁壽宮夏四月乙卯上不豫六月庚午大赦有星八月中數日而退長人見於鴈門秋七月乙未日青無光八日乃復甲辰帝疾甚卧於仁壽宮與百寮辭訣上握手歔歔丁未崩于大寶殿時年六十四遺詔公卿大臣內外羣官勦力王室與皇太子廣共安天下朕雖瞑目何所復恨國家大事不可限以常制其凶禮所須纔令周事務從節儉既葬公除悉遵舊典諸州總管刺史以下宜率其職不須奔赴乙

卯發喪河間楊柳四株無故黃落既而花葉復生八月
丁卯梓宮至自仁壽宮丙子殯於大興前殿十月乙卯
葬於太陵同墳而異穴士庶赴葬者皆聽入視陵內帝
性嚴重有威容外質木而內明敏有大略初得政之始
羣情不附諸子幼弱內有六王之謀外致三方之亂握
彊兵居重鎮者皆周之舊臣上推以赤心各盡其用不
踰期月剋定三邊未及十年平一四海薄賦歛輕刑罰
內修制度外撫戎夷每旦聽朝日昃忘倦居處服翫每

事儉素令行禁止上下化之開皇仁壽之間大夫不衣綾綺而無金玉之飾常服率多布帛裝帶不過以銅鐵骨角而已雖嗇於財至於賞賜有功亦無所愛惜每乘輿四出路逢上表者駐馬親自臨問或潛遣行人采聽風俗吏政得失民間疾苦無不留意嘗遇關中飢遣左右視百姓所食有得豆屑雜糠而奏之者上流涕以示羣臣深自咎責為之損膳而不御酒肉者殆將一期及東拜太山關中戶口就食洛陽者道路相屬帝敕斥侯

不得輒有驅逼男女參廁於仗衛之間遇逢扶老攜幼者輒引馬避之慰勉而去至艱險之處見負擔者遽令左右扶助之其有將士戰歿必加優賞仍令使者就家勞問自彊不息朝夕孜孜民庶殷繁帑藏充實雖未能致臻於至道亦足稱近代之良主然雅性沈猜素無學術好為小數言神燭聖杖堪能療病又信王劭解石丈以為已瑞不達大體故忠臣義士莫得盡心竭辭其草創元勲及有功諸將誅夷獲罪罕有存者又不悅詩書

楊素由之希旨遂奏除學校唯婦言是用廢黜諸子逮于暮年持法尤峻喜怒失常果於殺戮嘗令左右送西域朝貢使出關其所經之處受牧宰小物饋鸚鵡麋皮馬鞭之屬聞而大怒又詣武庫見署中蕪穢不治於是執武庫令及諸受遺者出開遠門外親自臨決死者數十人又徃徃潛令賂遺令史府史受者必死無所寬貸議者以此少之

高祖開皇二十年仁壽四年即位二十四年

煬皇帝諱廣一名英小字阿麼高祖第二子也母曰文獻獨孤皇后上美姿儀少敏慧高祖及后於諸子中特所鍾愛在周以高祖勲封鴈門郡公開皇元年立為晉王拜柱國并州總管時年十三尋授武衛大將軍進上柱國河北道行臺尚書令大將軍如故高祖令項城公歆安道公才李徹輔導之上好學善屬文沈深嚴重朝野屬望高祖密令善相者來和徧視諸子和曰晉王眉上雙骨隆起貴不可言既而高祖幸上所居第見樂器

絃多斷絕又有塵埃若不用者以為不好聲伎之翫上
尤自矯飾當時稱為仁孝嘗觀獵遇雨左右進油衣上
曰士卒皆霑濕我獨衣此乎乃令持去六年轉淮南道
行臺尚書令其年徵拜雍州牧內史令八年冬大舉伐
陳以上為行軍元帥及陳平執陳湘州刺史施文慶散
騎常侍沈客卿市令湯慧朗刑法監徐析尚書都令史
暨慧以其邪佞有害於民斬之石闕下以謝三吳於是
封府庫資財無所取天下稱賢進位太尉賜路車乘馬

袞冕之服元珪白璧各一隻復拜并州總管俄而江南
高智慧等相聚作亂徙上為揚州總管鎮江都每歲一
朝高祖之祠太山也領武侯大將軍明年歸藩後數載
突厥寇邊復為行軍元帥出靈武無虜而旋及太子勇
廢立上為皇太子是月當受冊高祖曰吾以太興公成
帝業令上出舍太興其夜烈風大雪地震山崩民舍多
壞壓死者百餘口仁壽初奉詔巡撫東南是後高祖每
避暑仁壽宮恒令上監國四年七月高祖崩上即位於

仁壽宮八月奉梓宮還京師并州總管漢王諒舉兵反
詔尚書左僕射楊素討平之九月乙巳以備身將軍崔
彭為左領軍大將軍十一月乙未幸洛陽丙申發丁男
十數萬掘塹自龍門東接長平汲郡抵臨清關度河至
浚儀襄城達于上洛以置關防癸丑詔營建東京於雒
陽十二月乙丑右武衛將軍來護兒為右驍衛大將軍
戊辰以柱國李景為右武衛大將軍以右衛率周羅暉
為右武侯大將軍

大業元年春正月壬辰朔大赦改元立妃蕭氏為皇后
改豫州為溱州洛州為豫州廢諸州總管府丙申立晉
王昭為皇太子丁酉以上柱國宇文述為左衛大將軍
上柱國郭衍為左武衛大將軍延壽公于仲文為右衛
大將軍己亥以豫章王暕為豫州牧戊申發八使巡省
風俗詔令薦拔淹滯申達幽枉孝悌力田給以優復鰥
寡孤獨不能自存者量加賑濟義夫節婦旌表門閭高
年之老加其板授篤疾之徒給以侍丁其有名行顯著

操履修潔及學業才能一藝可取咸宜訪採將身入朝
所在州縣以禮發遣其蠹政害民不便於時者使還之
日具錄奏聞己酉以吳州總管宇文弼為刑部尚書二
月己卯以尚書左僕射楊素為尚書令三月丁未詔尚
書令楊素納言楊達將作大匠宇文愷營建東京徙豫
州郭下居民以實之戊申詔民下有知州縣官人政治
苛刻侵害百姓背公徇私不便於民者聽詣朝堂封奏
又於皂澗營顯仁宮採海內奇禽異獸草木之類以實

園苑徙天下富商大賈數萬家於東京辛亥發河南諸
郡男女七百萬開通濟渠自西苑引穀洛水達于河自
板渚引河通于淮庚申遣黃門侍郎王弘上儀同于士
澄往江南採木造龍舟鳳舸黃龍赤艦樓船等數萬艘
夏四月癸亥大將軍劉仲方擊林邑破之五月庚戌戶
部尚書義豐侯韋沖卒甲子熒惑入太微秋七月丁酉
制戰亡之家給復十年丙午滕王綸衛王集並奪爵徙
邊閏七月甲子以尚書令楊素為太子太師安德王雄

為太子太傅河間王弘為太子太保丙子詔諸孝秀在
家及見入學者若有篤志好古耽典悅禮學行優敏堪
膺時務所在採訪具以名聞即當隨其器能擢以不次
若研精經術未願進仕可依其藝業深淺門蔭高卑雖
未升朝並量準給祿其國子等學亦宜申明舊制教習
生徒具為課試之法以盡砥礪之道八月壬寅上御龍
舟幸江都以左武衛大將軍郭衍為前軍右武衛大將
軍李昫為後軍文武官五品已上給樓船九品已上給

黃篋舳艫相接二百餘里冬十月己丑赦江淮已南揚州給復五年舊總管內給復三年十一月己未以大將軍崔仲方為禮部尚書

二年春正月辛酉東京成賜監督者有差以大理卿梁毗為刑部尚書丁卯遣十使併省州縣二月丙戌詔尚書令楊素吏部尚書牛弘大將軍宇文愷內史侍郎虞世基禮部侍郎許善心制定輿服始備輦輅及五時副車上常服皮弁十有二珎文官弁服佩玉五品已上給

犢車通懷三公親王加油絡武官平巾幘袴褶三品以上給袍襖下至胥吏服色各有差非庶人不得戎服戊戌置都尉官三月庚午車駕發江都先是太府少卿何稠太府丞雲定興盛修儀仗於是課州縣送羽毛百姓求捕之網羅被水陸禽獸有堪斃眊之用者殆無遺類至是而成夏四月庚戌上自伊闕陳法駕備千乘萬騎入於東京辛亥上御端門大赦天下免今年租賦癸丑以冀州刺史楊文思為民部尚書五月甲寅金紫光祿

大夫兵部尚書李通坐事免乙卯詔自古以來賢人君子有功德於民者並宜營立祠宇以時致祭墳壟之處不得侵踐有司量為條式以聞六月壬子以尚書令太子太師楊素為司徒進封豫章王暕為齊王秋七月癸丑以衛尉卿衛元為工部尚書庚申制百官不得計考增級必有德行功能灼然顯著者擢之壬戌擢藩邸舊臣鮮于羅等二十七人官爵有差甲戌皇太子昭薨乙亥上柱國司徒楚國公楊素薨八月辛卯封皇孫佖為

燕王侑為越王侑為代王九月乙丑立秦王俊子浩為
秦王冬十月戊子以靈州刺史段文振為兵部尚書十
二月庚寅詔自古以來帝王陵墓可給隨近十戶蠲其
雜役以供守視

三年春正月癸亥敕并州逆人已流配而逃亡者所獲
之處即宜斬決丙子長星竟天出於東壁二旬而止是
月武陽郡上言河水清二月己丑彗星見於東井文昌
歷太陵五車北河入太微掃帝座前後百餘日而止三

月辛亥車駕還京師壬子以大將軍姚辯為左衛將軍
癸丑遣羽騎朱寬使於流求國乙卯河間王弘薨夏四
月庚辰詔曰古者帝王觀風俗皆所以憂勤兆庶安集
遐荒自蕃夷內附未遑親撫山東經亂復加存恤今欲
安輯河北巡省趙魏所司依式甲申頒律令大赦天下
關內給復三年壬辰改州為郡改度量衡並依古式改
上柱國以下官為大夫甲午詔以孝悌德行節義可稱
操履清潔彊毅正直執憲不撓學業優敏文才美秀及

才堪將畧力有驍壯者為十科令文武有職事者五品
已上依令十科舉人有一於此不必求備朕當待以不
次隨才升用其見任九品已上官者不在舉送之限丙
申車駕北巡狩丁酉以刑部尚書宇文弼為禮部尚書
戊戌敕百司不得踐暴禾稼其有須開為路者有司計
地所收即以近倉酬賜務從優厚己亥至赤岸澤以太
牢祭故太師李穆五月丁巳突厥啟民可汗遣子拓特
勒來朝戊午發河北十餘郡丁男自太行山達于并州

以通馳道丙寅啓民可汗遣其兄子毗黎伽特勒來朝
辛酉啓民可汗遣使請自入塞奉迎輿駕上不許癸酉
有星孛于文昌上將星常皆動搖六月辛巳獵於連谷
丁亥詔為高祖文皇帝別建廟宇以彰盛德戊子次榆
林郡丁酉啓民可汗來朝己亥吐谷渾高昌並遣使貢
方物甲辰上御北樓觀漁于河以宴百寮秋七月辛亥
啓民可汗上表請變服襲冠帶詔啓民贊拜不名位諸
侯王上甲寅上於郡城東御大帳其下備儀衛建旌旗

宴啟民及其部落三千五百人奏百戲之樂賜啟民及其部落各有差丙子殺光祿大夫賀若弼禮部尚書宇文弼太常卿高頴尚書左僕射蘇威坐事免發丁男百餘萬築長城西距榆林東至紫河二旬而罷死者十六八月壬午車駕發榆林乙酉啟民飾廬清道以候乘輿帝幸其帳啟民奉觴上壽宴賜極厚上謂高麗使者曰歸語爾王當早來朝見不然者吾與啟民巡彼土矣皇后亦幸義成公主帳己丑啟民可汗歸蕃癸巳入樓

煩闕壬寅次太原詔營晉陽宮九月己未次濟源幸御
史大夫張衡宅宴享極歡己巳至于東都壬申以齊王
暕為河南尹開府儀同三司癸酉以戶部尚書楊文思
為納言

四年春正月乙巳詔發河北諸郡男女百餘萬開永濟
渠引沁水南達于河北通涿郡庚戌百寮大射於允武
殿丁卯賜城內居民米各十石壬申以太府卿元壽為
內史令鴻臚卿楊元感為禮部尚書癸酉以工部尚書

衛元為右武侯大將軍大理卿長孫熾為戶部尚書二月己卯遣司朝謁者崔毅使突厥處羅致汗血馬三月辛酉以將作大匠宇文愷為工部尚書壬戌百濟倭赤土迦羅舍國並遣使貢方物乙丑車駕幸五原因出塞巡長城丙寅遣屯田主事常駿使赤土致羅罽夏四月丙午以離石之汾源臨泉鴈門之秀容為樓煩郡起汾陽宮癸丑以河內太守張定和為左屯衛大將軍乙卯詔於萬壽成為突厥意利珍豆啓民可汗置城造屋其

帷帳牀褥以上隨宜量給務從優厚五月壬申蜀郡獲
三足烏張掖獲元狐各一秋七月辛巳發丁男二十餘
萬築長城自榆林谷而東乙未左翊衛大將軍宇文述
破吐谷渾於曼頭赤水八月辛酉親祠恒岳河北道郡
守畢集大赦天下車駕所經郡縣免一年租調九月辛
未徵天下鷹師悉集東京至者萬餘人戊寅彗星出五
車埽文昌至房而滅辛巳詔免長城役者一年租賦冬
十月丙午詔立孔子後為紹聖侯令有司求其苗裔錄

以申上辛亥詔求周漢魏晉之胄緒並立後以存繼絕之義乙卯頒新式於天下

五年春正月丙子改東京為東都癸未詔天下均田戊子上自東都還京師己丑制民間鐵义搭鉤積刃之類皆禁絕之太守每歲密上屬官景迹二月戊戌次于閭鄉詔祭古帝王陵及開皇功臣墓庚子制魏周官不得為蔭辛丑赤土國遣使貢方物戊申車駕至京師丙辰宴耆舊四百人於武德殿頒賜各有差己未上御崇德殿

之西院愀然不悅顧謂左右曰此先帝所居寔用增感情所未安於此院之西別營一殿壬戌制父母聽隨子之官三月己巳車駕西巡河右庚午有司言武功男子史永遵與從父昆弟同居上嘉之賜物一百段米二百石表其門閭乙亥幸扶風舊宅夏四月己亥大獵於隴西壬寅高麗吐谷渾伊吾並遣使來朝乙巳次狄道党項羗來貢方物癸亥出臨津關度黃河至西平陳兵講武五月乙亥上大獵於延山長圍周亘二千里庚辰入

長寧谷壬午度星嶺甲申宴羣臣於金山之上丙戌梁
浩疊御馬度而橋壞斬朝散大夫黃亘及督役者九人
吐谷渾王率衆保覆袁川帝分命內史元壽南屯金山
兵部尚書段文振北屯雪山太僕卿楊義臣東屯琵琶
峽將軍張壽西屯泥嶺四面圍之吐谷渾王伏允以數
十騎遁出遣其名王詐稱伏允保車我真山壬辰詔右
屯衛大將軍張定和往捕之定和挺身挑戰為賊所殺
亞將柳武建擊破之斬首數百級甲午其仙頭王窮蹙

率男女十餘萬口來降六月丁酉遣左光祿大夫梁默
右翊衛將軍李瓊等追吐谷渾王皆遇賊死之癸卯經
大斗拔谷山路隘險魚貫而出風霰晦暝與後宮相失
士卒凍死者太半丙午次張掖辛亥詔諸郡學業該通
才藝優洽膂力驍壯超絕等倫在官勤奮堪理政事立
性正直不避彊禦四科舉人壬子高昌王麴伯雅來朝
伊吾吐屯設等獻西域數千里之地大悅癸丑置西
海河源鄯善且末等四郡丙辰上御觀風行殿盛陳文

物奏九部樂設魚龍曼延宴高昌王吐屯設於殿上以
寵異之其蠻夷陪列者三十餘國戊午大赦天下開皇
已來流配悉放還鄉晉陽逆黨不在此例隴右諸郡給
復三年秋七月丁卯置馬牧於青海渚中以求龍種無
効而止九月癸未車駕入長安冬十月癸亥詔今歲耆
老赴集者可於近郡處置年七十已上疾患沈滯不堪
居職即給賜帛送還本郡其官至七品以上者量給廩
以終厥身十一月丙子車駕幸東都

六年春正月癸亥朔旦有盜數十人皆素冠練衣焚香持華自稱彌勒佛入自建國門監門者皆稽首既而奪衛士仗將為亂齊王暕遇而斬之於是都下大索與相連坐者千餘家丁丑角觝大戲於端門街天下奇伎異藝畢集終月而罷帝數微服往觀之己丑倭國遣使貢方物二月乙巳虎賁郎將陳稜朝請大夫張鎮州擊流求破之獻俘萬七千口頒賜百官乙卯詔以國初草創妄假茅土名實相乖自今已後唯有功勲乃得賜封仍

令子孫承襲丙辰改封安德王雄為觀王河間王子慶
為郇王庚申徵魏齊周陳樂人悉配太常三月癸亥幸
江都宮甲子以鴻臚卿史祥為左驍衛大將軍夏四月
丁未宴江淮已南父老頒賜各有差六月辛卯室韋赤
土並遣使貢方物壬辰鴈門賊帥尉文通聚衆三千保
於莫壁谷遣鷹揚楊伯泉擊破之甲寅制江都太守秩
同京尹冬十月壬申刑部尚書梁毗卒壬子戶部尚書
銀青光祿大夫長孫熾卒十二月己未左光祿大夫吏

部尚書牛弘卒辛酉朱崖人王萬昌舉兵作亂遣隴西太守韓洪討平之

七年春正月壬寅左武衛大將軍光祿大夫真定侯郭衍卒二月己未上升鈞臺臨揚子津大宴百寮頒賜各有差庚申百濟遣使朝貢乙亥上自江都御龍舟入通濟渠遂幸于涿郡壬午詔以高麗失禮將欲問罪遼左仍事省方入往涿郡巡撫民俗其河北諸郡及山西山東年九十已上版授太守八十者授縣令三月丁亥右

光祿大夫左屯衛大將軍姚辯卒夏四月庚午幸涿郡
之臨朔宮五月戊子以武威太守樊子蓋為民部尚書
秋大水山東河南漂沒三十餘郡民相賣為奴婢冬十
月乙卯底柱山崩堰水逆流數十里戊午以東平太守
吐万緒為左屯衛大將軍十二月己酉突厥處羅多利
可汗來朝帝大悅接以殊禮于時遼東戰士及餽運者
填咽於道晝夜不絕苦役者始為羣盜甲子敕都尉鷹
揚與郡縣相知追捕隨獲斬決之

八年春正月辛巳大軍集于涿郡以兵部尚書段文振
為左候衛大將軍壬午下詔東伐高麗分命諸軍其左
第一軍出鏤方道第二軍長岑道第三軍海冥道第四
軍蓋馬道第五軍建安道第六軍南蘇道第七軍遼東
道第八軍元菟道第九軍扶餘道第十軍朝鮮道第十
一軍沃沮道第十二軍樂浪道右第一軍黏蟬道第二
軍含資道第三軍渾彌道第四軍臨屯道第五軍候城
道第六軍提奚道第七軍踏頓道第八軍肅慎道第九

軍碣石道第十軍東腕道第十一軍帶方道第十二軍
襄平道凡二十四軍總一百一十三萬三千八百號二
百萬其餽運者倍之癸未第一軍發終四十日引師乃
盡旌旗亘千里近古出師之盛未之有也乙未以右候
衛大將軍衛元為刑部尚書甲辰內史令元壽卒二月
甲寅詔征遼從行從一品以下依飛募人以上家口郡
縣宜數存問有糧食乏少皆賑給之或雖有田疇貧弱
不能自耕可於多丁富室勸課相助壬戌司空京兆尹

光祿大夫觀王雄薨三月辛卯兵部尚書左候衛大將軍段文振卒癸巳上御師甲子臨戎于遼水橋戊戌大軍為賊所拒不果濟右屯衛大將軍左光祿大夫麥鐵杖虎賁郎將錢士雄孟金義等皆死之甲午車駕度遼大戰于東岸擊賊破之進圍遼東乙未大頓見二大鳥高丈餘皜身朱足游泳自若上異之命工圖寫并立銘頌五月戊午納言楊達卒于時諸將各奉旨不敢越機既而高麗各固城守攻之不下六月己未幸遼東責怒

諸將止城西數里御六合城七月壬午宇文述等敗績
于薩水右屯衛將軍薛世雄死之九軍並陷師奔還至
者千餘騎癸卯班師九月庚辰上至東都已丑詔諸武
臣授勲官者不得回授文階以其不習政事故也冬十
月戊寅工部尚書宇文愷卒十一月己卯以宗女華容
公主嫁于高昌王辛巳光祿大夫韓壽卒甲申敗將宇
文述于仲文等除名為民斬尚書右丞劉士龍以謝天
下是歲大旱疫民多死山東尤甚密詔江淮南諸郡閱

視民間童女姿質端麗者每歲貢之

九年春正月丁丑徵天下兵募民為驍果集于涿郡壬午賊帥杜彥永王潤等陷平原郡大掠而去辛卯置折衝果毅武勇雄武等郎將官以領驍果乙未平原李德逸聚衆數萬稱阿舅賊劫掠山東靈武白榆妄稱奴賊劫掠牧馬北連突厥隴右多被其患遣將軍范貴討之連年不能尅戊戌大赦己亥遣代王侑刑部尚書衛元鎮京師辛丑以右驍衛將軍李渾為右驍衛大將軍二

月己未濟北人韓進洛聚衆數萬為羣盜壬午復宇文
述等官爵又徵兵討高麗三月丙子濟北人孟海公起
兵為盜衆至數萬丁丑發丁男十萬城大興戊寅幸遼
東以越王侗工部尚書樊子蓋鎮東都庚子北海人郭
方預聚徒為賊自號盧公衆至三萬攻陷郡城大掠而
去夏四月庚午車駕度遼壬申遣宇文述楊義臣趣平
壤城五月丁丑熒惑入南斗己卯濟北人甄寶車聚衆
萬餘寇掠城邑六月乙巳禮部尚書楊元感反於黎陽

丙辰元感逼東都河南贊治裴弘策拒之反為賊所敗
戊辰兵部侍郎斛斯政奔于高麗庚午上班師高麗犯
後軍敕右武衛大將軍李景為後拒遣左翊衛大將軍
宇文述左候衛將軍屈突通等馳傳發兵以討元感秋
七月己卯令所在發人城縣府驛癸未餘杭人劉元進
舉兵反衆至數萬八月壬寅左翊衛大將軍宇文述等
破楊元感於閬鄉斬之餘黨悉平癸卯吳人朱爕晉陵
人管崇擁衆十萬餘自稱將軍寇江左甲辰制驍果之

家蠲免賦役丁未詔郡縣城去道過五里已上者徙就
之戊申制盜賊籍沒其家乙卯賊帥陳瑱等三萬攻陷
信安郡辛酉司農卿光祿大夫葛國公趙元淑以罪伏
誅九月己卯濟陰人吳海流東海人彭孝才並舉兵為
盜衆至數萬庚辰賊帥梁慧尚聚衆四萬陷蒼梧郡甲
午車駕次上谷以供費不給上大怒免太守虞荷等官
丁酉東陽人李三兒向但子舉兵作亂衆至萬餘閏月
己巳幸博陵冬十月丁丑賊帥呂明星率衆數千圍東

郡虎賁郎將費青奴擊斬之乙酉詔以博陵為高祖歷試之地可改為高陽郡赦境內死罪已下給復一年於是召高祖時故吏皆量才授職壬辰以納言蘇威為開府儀同三司朱熲管崇推劉元進為天子遣將軍吐萬緒魚俱羅討之連年不能剋齊人孟讓王薄等衆十餘萬據長白山攻剽諸郡清河賊張金稱衆各數萬勃海賊帥格謙自號燕王孫宣雅自號齊王衆各十萬山東苦之丁亥以右候衛將軍郭榮為右候衛大將軍十一

月己酉右候衛將軍馮孝慈討張金稱於清河反為所敗孝慈死之十二月甲辰車裂楊元感弟朝請大夫積善及黨與十餘人仍焚而揚之丁亥扶風人向海明舉兵作亂稱皇帝建元白鳥遣太僕卿楊義臣擊破之

十年春正月甲寅以宗女為信義公主嫁於突厥曷娑那可汗二月辛未詔百寮議伐高麗數日無敢言者戊子詔往歲征遼東陣亡者衆不及埋藏可遣使分道收葬設祭辛卯詔親征高麗分命六師百道俱進丁酉扶

風人唐弼舉兵反衆十萬推李弘為天子自稱唐王三
月壬子行幸涿郡癸亥次臨榆宮親御戎服禡祭黃帝
斬叛軍者以饗鼓夏四月辛未彭城賊張大彪聚衆數
萬保縣薄山為盜遣榆林太守董純擊破斬之甲午車
駕次北平五月庚子詔舉郡孝悌廉潔各十人壬寅賊
帥宋世謨陷琅邪庚申延安人劉迦論舉兵反自稱皇
王建元大世六月辛未賊帥鄭文雅林寶護等衆三萬
陷建安郡太守楊景祥死之秋七月癸丑車駕次懷遠

鎮乙卯曹國遣使貢方物甲子高麗遣使請降囚送斛
斯政上大悅八月己巳班師右衛大將軍左光祿大夫
鄭榮卒冬十月丁卯上至東都已丑還京師十一月丙
申支解斛斯政於金光門外乙巳有事於南郊己酉賊
帥司馬長安破長平郡乙卯離石胡劉苗王舉兵反自
稱天子以其弟六兒為永安王衆至數萬將軍潘長文
討之不能剋是月賊帥王德仁擁衆數萬保林慮山為
盜十二月壬申上如東都其日大赦天下戊子入東都

庚寅賊帥孟讓衆十餘萬據都梁宮遣江都丞王世充擊破之盡虜其衆

十一年春正月甲午朔宴百寮突厥新羅靺鞨畢大辭訶咄傳越烏那曷波臘吐火羅俱慮建忽論靺鞨訶多沛汗龜茲疏勒于闐安國曹國何國穆國畢衣密失範延伽折契丹等國並遣使朝貢戊戌虎賁郎將高建毗破賊帥顏宣政於齊郡虜男女數千口乙卯大會蠻夷設魚龍曼延之樂頒賜各有差二月戊辰賊帥楊仲緒

率衆萬餘攻北平滑公李景破斬之庚午詔百姓悉城
居丙子王須拔反自稱漫天王國號燕賊帥魏刁兒自
稱歷山飛衆各十餘萬北連突厥南寇燕趙三月丁酉
殺右驍衛大將軍光祿大夫郕公李渾將作監光祿大
夫李敏並族滅其家癸卯賊帥司馬長安破西河己酉
幸太原避暑汾陽宮秋七月己亥淮南人張起緒舉兵
為盜衆至三萬辛丑光祿大夫右禦衛大將軍張壽卒
八月乙卯巡北塞戊辰突厥始畢可汗率騎數十萬謀

襲乘輿義成公主遣使告變壬申車駕馳幸鴈門癸酉突厥圍城官軍頻戰不利上大懼欲率精騎潰圍而出民部尚書樊子蓋固諫乃止齊王暕以後軍保于崞縣甲申詔天下諸郡募兵於是守令各來赴難九月甲辰突厥解圍而去丁未曲赦太原鴈門死罪已下冬十月壬戌上至于東都丁卯彭城人魏騏驎聚衆萬餘為盜寇魯郡壬申賊帥盧明月聚衆十餘萬寇陳汝間東海賊李子通擁衆度淮自號楚王建元明政寇江都十一

月乙卯賊帥王須拔破高陽郡十二月戊寅有大流星如斛墜明月營破其衝車庚辰詔民部尚書樊子蓋發關中兵討絳郡賊敬盤阬柴保昌等經年不能剋譙郡人朱粲擁衆數十萬寇荆襄僭稱楚帝建元昌達漢南諸郡多為所陷焉

十二年春正月甲午鴈門人翟松栢起兵於靈邱衆至數萬轉攻傍縣二月己未真臘遣使貢方物甲子夜有二大鳥似鵬飛入大業殿止于御幄至明而去癸亥東

海賊盧公暹率衆萬餘保于蒼山夏四月丁巳顯陽門
灾癸亥魏刁兒所部將甄翟兒號歷山飛衆十萬轉寇
太原將軍潘長文討之反為所敗長文死之五月丙戌
朔日有蝕之既癸巳有大流星隕於吳郡為石壬午上
於景華宮徵求螢火得數斛夜出遊山放之光徧巖谷
秋七月壬戌民部尚書光祿大夫濟北公樊子蓋卒甲
子幸江都宮以越王侗光祿大夫段達太府卿元文都
檢校民部尚書韋津右武衛將軍皇甫無逸右司郎盧

楚等總留守事奉信郎崔民象以盜賊充斥於建國門
表諫不宜巡幸上大怒先解其頤乃斬之戊辰馮翊人
孫華自號總管舉兵為盜高涼通守洗瑤徹舉兵作亂
嶺南溪洞多應之己巳熒惑守羽林月餘乃退車駕次
汜水奉信郎王愛仁以盜賊日盛諫上請還西京上怒
斬之而行八月乙巳賊帥趙萬海衆數十萬自恒山寇
高陽壬子有大流星如斗出王良閣道聲如壞牆癸丑
有大流星如甕出羽林九月丁酉東海人杜揚州沈覓

敵等作亂衆至數萬右禦衛將軍陳稜擊破之戊午有二枉矢出北斗魁委曲蛇形注於南斗壬戌安定人荔非世雄殺臨涇令舉兵作亂自號將軍冬十月己丑開府儀同三司左翊衛大將軍光祿大夫許公宇文述薨十二月癸未鄱陽賊操天成舉兵反自號元興王建元始興攻陷豫章郡乙酉以右翊衛大將軍來護兒為開府儀同三司行左翊衛大將軍壬辰鄱陽人林士弘自稱皇帝國號楚建元太平攻陷九江廬陵郡唐公李淵

破甄翟兒於西河虜男女千口

十三年春正月壬子齊郡賊杜伏威率衆度淮攻陷歷陽郡丙辰勃海賊竇建德設壇於河間之樂壽自稱長樂王建元丁丑辛巳賊帥徐圓朗率衆數千破東平郡弘化人到企成聚衆萬餘人為盜傍郡苦之二月壬午朔方人梁師都殺郡丞唐世宗據郡反自稱大丞相遣銀青光祿大夫張世隆擊之反為所敗戊子賊率王子英破上谷郡己丑馬邑校尉劉武周殺太守王仁恭舉

兵作亂北連突厥自稱定楊可汗庚寅賊帥李密翟讓等陷興洛倉越王侗遣虎賁郎將劉長恭光祿少卿房胤擊之反為所敗死者十五六庚子李密自號魏公稱元年開倉以賑羣盜衆至數十萬河南諸郡相繼皆陷焉壬寅劉武周破虎賁郎將王智辯於桑乾鎮智辯死之三月戊午廬江人張子路舉兵反遣右禦衛將軍陳稜討平之丁丑賊帥李通德衆十萬寇廬江左屯衛將軍張鎮州擊破之夏四月癸未金城校尉薛舉率衆反

自稱西秦霸王建元秦興攻陷隴右諸郡己丑賊帥孟讓夜入東都外郭燒豐都市而去癸巳李密陷迴洛東倉丁酉賊帥房憲伯陷汝陰郡是月光祿大夫虎賁郎將裴仁基淮陽太守趙佗等並以衆叛歸李密五月辛卯夜有流星如甕墜於江都甲子唐公李淵起兵太原丙寅突厥數千騎寇太原淵擊破之秋七月壬子熒惑守積屍丙辰武威人李軌舉兵反攻陷河西諸郡自稱涼王建元安樂八月辛巳唐公李淵破虎牙郎將宋老

生於霍邑斬之九月己丑帝括江都子女寡婦以配從
兵是月武陽郡丞元寶藏以郡叛歸李密與賊帥李文
相攻陷黎陽倉彗星見於營室冬十月丁亥太原楊世
洛聚衆萬餘人寇掠城邑丙申羅令蕭銑以縣反鄆陽
人董景珍以郡反迎銑於羅縣號為梁王攻陷傍郡戊
戌虎賁郎將高毗敗濟北郡賊甄寶車於鹽山十一月
丙辰唐公李淵入京師辛酉遙尊帝為太上皇立代王
侑為帝改元義寧上起宮丹陽將遜于江左有烏鵲來

巢幄帳驅不能止熒惑犯太微有石自江浮入于揚子
日光四散如流血上甚惡之義寧二年三月右屯衛將
軍宇文化及虎賁郎將司馬德戡元禮監門直閣裴虔
通將作少監宇文智及武勇郎將趙行樞鷹揚郎將孟
景內史舍人元敏符璽郎李覆牛方裕千牛左右李本
本弟孝質直長許弘仁薛世良城門郎唐奉義醫正張
愷等以驍果作亂入犯宮闈上崩于溫室時年五十蕭
后令宮人撤牀簀為棺以埋之化及發後右禦衛將軍

陳稜奉梓宮於成象殿葬吳公臺下發歛之始容貌若生衆咸異之唐平江南之後改葬雷塘初上自以蕃王次不當立每矯情飾行以釣虛名陰有奪宗之計時高祖雅重文獻皇后而后性忌妾媵皇太子勇內多嬖幸以此失愛帝後庭有子皆不育之示無私寵取媚於后大臣用事者傾心與交中使至第無貴賤皆曲承顏色申以厚禮婢僕往來者無不稱其仁孝又常私入宮掖密謀於文獻皇后楊素等因機構扇遂成廢立自高祖

大漸暨諒闇之中蒸淫無度山陵始就即事巡游以天下承平日久士馬全盛慨然慕秦皇漢武之事乃盛治宮室窮極侈靡召募行人分使絕域諸蕃至者厚加禮賜有不恭命以兵擊之盛興屯田於玉門柳城之外課天下富室分道市戎馬足直十餘萬富室坐是凍餒者十家而九性多詭譎所幸之處不欲人知每幸之所輒數道置頓四海珍羞殊味水陸必備馬求市者無遠不至郡縣競為獻食豐厚者進擢踈儉者獲罪姦吏侵漁

內外虛竭頭會箕歛民不聊生于時軍國多務日不暇
給帝方驕怠惡聞政事冤屈不理奏請罕決又猜忌臣
下無所專任朝臣有不合意者必構其罪而族滅之高
頰賀若弼先皇心膂參謀帷幄張衡李金才藩邸故舊
績著經綸惡其直道忌其正言求其無形之罪加以丹
頸之戮其餘事君盡禮蹇蹇匪躬無罪無辜橫受夷戮
者不可勝紀政刑弛紊賄貨公行莫敢有言道路以目
六軍不息百役繁興行者不歸居者失業人饑相食邑

落為墟上弗之恤也東西行幸靡有定居每以供費不給逆收數年之賦所至唯與後宮流連耽湎惟日不足招迎嫖娼朝夕共肆醜言又引少年令與宮人穢亂不軌不遜以為娛樂區宇之內盜賊蜂起劫掠從官屠陷城邑近臣互相掩蔽皆隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力不加賞賜百姓無辜咸受屠戮蒸庶積怨天下土崩至於就禽而猶未之寤也

煬帝大業十三年其年唐立恭帝改義寧明年而煬帝遇弒即位十四年

恭皇帝諱侑元德太子之子也母曰韋妃帝性聰敏有氣度大業三年立為陳王後數載徙為代王及煬帝親征遼東令於京師總留事十一年從幸晉陽拜太原太守尋鎮京師唐公李淵入長安尊煬帝為太上皇奉帝纂業以十一月壬戌即皇帝位於大興殿大赦天下詔改大業十三年為義寧元年十一月十六日昧爽以前

大辟罪已下皆赦除之常赦所不免者不在赦限甲子以光祿大夫大將軍太尉唐公李淵為假黃鉞使持節大都督內外諸軍事尚書令大丞相進封唐王丙寅詔軍國機務事無大小文武設官位無貴賤憲章賞罰咸歸相府己巳以唐王李淵子隴西公建成為唐國世子敦煌公世民為京兆尹改封秦公元吉為齊公太原置鎮北府乙亥張掖康老和舉兵反十二月癸未薛舉自稱天子寇扶風秦公世民為元帥擊破之丁亥桂陽人

曹武徹舉兵反建元通聖丁酉唐兵禽驍衛大將軍屈突通於閩鄉乙巳賊帥張善安陷廬江郡

二年春正月丁未詔唐王李淵劔履上殿入朝不趨贊拜不名加前後羽葆鼓吹壬戌將軍王世充為李密所敗河內通守孟善誼虎賁郎將王辯楊威劉長恭梁德董智通皆死之庚戌河陽郡尉獨孤武都降於李密三月丙辰右屯衛將軍宇文化及弒太上皇於江都宮右禦衛將軍獨孤盛死之齊王暕趙王果燕王倓右翊衛

大將軍宇文協內史侍郎虞世基御史大夫裴蘊給事
郎許善心皆遇害化及立秦王浩為帝自稱大丞相朝
士文武皆受其官爵光祿大夫宿公麥才折衝郎將朝
請大夫沈同謀討賊夜襲化及營反為所害戊辰詔唐
王李淵備九錫之禮加璽紱遠游冠綠綬綬位在諸侯
王上唐國置丞相已下一依舊式五月乙巳朔詔唐王
李淵冕十有二旒建天子旌旗出警入蹕金根車駕備
五時副車置旄頭雲罕車舞八佾設鐘簾宮縣王后王

子王女爵命之號一遵舊典戊午詔遜位于唐如漢魏
故事仍敕有司凡有表奏辭讓皆不得以聞唐受命以
帝為鄆國公武德二年夏五月崩年十五

恭帝義寧二年

右隋三帝凡三十八年為唐所滅

通志卷十八